

Nalunaarusiaq aallaavigalugu Naalakkersuisut Inatsisartullu ikiorneqarsinnaajunnaarnertik pissutigalugu toquinnarusullutik kissaateqartunut ikiuineq qanoq isumaqarfigineraat, oqallisissiatut siunnersuut: "Toquinnarusuttunik ikiuineq inuiaqatigiittut qanoq isumaqarfigineripput aamma inuunermik navianartorsiortitsisumik nappaateqartunut tungiuinissamut suliniutit pillugit inerisaanissamut periarfissanik misissueqqissaarnermut suleqatigiissitap nassuiaataa".

(Inatsisartunut ilaasortaq Jens-Frederik Nielsen, Demokraatit)

Oqaaseqaat:

Siumuminngaaniit Inatsisartunut Ilaasortaq Jens-Frederik Nielsen, Demokraatit oqallisissiassatut saqqummiunneqartoq imaattumik oqaaseqarfigissuarput.

Siumuminngaaniit Kalaallit nunatsinni innuuttaasusut pitsaanerpaamik napparsimasortagut ikiorserneqarnissaat pingaartitarilluinnarparput. Nunatsinni peqqinnissaqarfipput taamaammat sapinngisamik aningaasaliisarnikkut malinnaatinniarsarisarnitsigut atorfissaqartitsineq aallaavigalugu ineriartortitseqataasarpugut. Soorunalimi soorlu nalunngikkipput nunatsinni aningaasaqarnerput killilersuisitsisutut aporfiusinnaasarpog, Nunatsinnimi aningaasaqarnitta inissisimanagera apeqqutaalluinnartarmat.

Siunnersuuteqartup inatsisartuni ilaasortap Demokraatinngaaneersut Jens Frederik Nielsen-ip saqqummiussaa nutaajunngilaq. Saqqummiunneqaaqqaarpoq UKA2018-mi, taamanikkut eqqartorneqarneqarnermini inatsisartut aalajangerput suleqatigiissitamik pilersitsisoqassasoq. Inatsisartullu aalajangernerat taamanikkut suliamik ingerlatsisuusut kingornatigut suliassartik naammassinikuuat nalunaarusiamilu suliaqarnikuullutik. Suliaqartullu aamma assigiinngitsunik inassuteqaaateqarnikuullutik. Suleqatigiissitarlu siulersorneqarpoq ukuninga:

Nunatta Nakorsaaneqarfia (Siulittaasoq), Kalaallit Nunaanni Nakorsat peqatigiiffiat, Kalaallit Nunaanni Peqqissaasut Kattuffiat aamma Peqqissaasut ileqqorissaarnermut Siunnersuisoqatigiivi, Inuit Pisinnaatitaaffii pillugit Siunnersuisoqatigiit, Neriuffik, Kalaallit Nunaanni ilagiit, Kommunit sinnerlugit Kommuneqarfik Sermersooq.

Suleqatigiissitarlu taamanikkut peqatigiillutik itigartitsinikuupput tunngavilersuuteqarlutik imaattumik "piartortut peruluttullu Kalaallit Nunaanni Peqqinnissaqarfimmi ataatsimut isigalugu akeqanngitsumik katsorsartinnissamut nakorsaatinullu periarfissatsialaqarnerat innuttaasullu periarfissamik taama ittumik annertunerusumik kissaateqannginnerannik isumaqartoqarmat".

Suleqatigiissitalu aamma taakkartorpaat napparsimasunut tunguinissamik inerisaasoqarnissaa, tamannalu peqqinnissaqarfiup inerisassallugu akisussaaffigissagaa aamma oqariartorpoq. Aammalu arlalinnik inerisarneqarsinnaasunik siunniussaqaarluni soorlu imaattunik:

Kalaallit Nunaanni Peqqinnissaqarfimmi inuunermik navianartorsiortitsisumik nappaateqartunut tunguinissamut immikkut ittumik immikkoortortaqaqarfimmi pilersitsineq.

Napparsimasunik sullissinermi najoqqutassanik periaatsinillu aalajangersimasunik pilersitsineq suliniummillu ataqatigiissumik aqqissuussineq.

Kalaallit Nunaanni Peqqinnissaqarfimmi kommuninilu sulisunik piginnaangorsaaneq.

Kalaallit Nunaanni Peqqinnissaqarfiup kommunillu akornanni suleqatigiinnerunikkut assersuutigalugu angerlarsimaffimmi ulloq unnuarlu neqeroorummik pilersitsineq.

Kalaallit Nunaanni Peqqinnissaqarfiup aammalu utoqqaat illuisa najugaqarfeqarfiisalu kommuninit aqunneqartut akornanni suleqatigiinneruneq.

Inuunermik navianartorsiortitsisumik nappaateqartunut tunguinermi qarasaasiakkut nakorsiarnermik neqeroorutit annertusarneqarnerat.

Napparsimasunut allaqqunneqarsinnaangitsumik toqujartortunut siusissukkut suliniummik pilersitsineq.

Innuttaasunut inuunermik navianartorsiortitsisumik nappaateqartunut oqilisaassinissamik periarfissanik pilersitsineq.

Qanigisaasunut sulingiffeqartunut periarfissanik atugassarititanillu pitsanngorsaaneq.

Tassa taakkua taanikkut suliaqartut tamakkua siunniunniukuvaat inerisarneqartussatut.

Siumuminngaaniit oqallisissiasatut saqqummiunneqartut isumaqarpugut akissutissanik imaaliallaannagassaangitsut, kiisalu aamma imaasiinnarlugu apeqqutitut qaqinneqartut akineqarsinnaangitsut. Kisianni inuiaqatigiisugut oqallinnissatsinnik periarfissaq ujjartorneqartariaqartoq atorluarneqartariaqartorlu. Siumuminngaaniit isumaqarpugut innuttaasut oqallinnerminni isumaat assigiinngitsut tunngavilersuutigineqartullu tusaqqaarlugit oqariartuutigisaat aallaavigalugit tunngavissaqarluarluta maanga inatsisartut ataatsimiittarfiannut oqallisigeqqaarlugu aalajangiinnaassusermik tunineqarsinnaasariaqartugut. Soorlutaaq nunamiut allat pissutsinik taama imaannaangitsigisunik innuttaminnik akuutitsisimallutik tunngavissaqaarlutik aalajangiussisinnaasarsimasut

Taamatut Siumumiit oqaaseqarluta oqallinneq pissarsinartuunissaanik kissaassivugut.

Mala Høy Kúko, Siumut